

# Conclusiun positiva da la sessiun a Flem

■ La regenza grischuna ha prendì enconuschientscha dal rapport final da l'organisaziun grischuna dal project davart la realisaziun da la sessiun d'atun da las chombras federalas a Flem Laax Falera. La regenza apprevscha la bilantscha positiva che vegn tratga en il rapport final ed engrazia a l'organisaziun dal project per la realisaziun da la sessiun encoronada da success.

Las finamiras e las aspectativas che la regenza ha tschentà en la sessiun d'atun èn vegnidas cuntanschidas dal tut-tafatg. Las commembras ed ils commembers da las chombras federalas han pudì salvar ina sessiun da lavur intensiva en il Grischun. L'infrastructura dal Park Hotel Waldhaus ha ademplì cumpletmain ils giavischs areguard il confort da lavar e d'alloschar. Er il program accompagnant ch'era organisà en moda rigurusa cun sias en total tschintg occurrenz ha pudì cuntentar las aspectativas da las commembras e dals commembers dal parlament d'emprènder d'enconuscher anc meglier il chantun Grischun en sia varietad. Medemamain è vegnida cuntanschida la finamira da preschentar la lingua e la cultura rumantscha sco part essenziala da la particularità grischuna. La qualitad da las occurrenz, la cordialità dals inscuters ed er la preschientscha activa da la lingua rumantscha – bain er grazia a l'engaschament da las voluntarias e dals voluntaris rumantschs sin l'areal da la sessiun – han creà gronda simpatia per il Grischun, a l'avis da la regenza. Il chantun Grischun e Grischun Vancanzas, la Regiun Surselva, las vischnancas da la sessiun d'atun Flem Laax Falera e las organisaziuns turisticas sco er il Park Hotel Waldhaus han profità da l'occaiun per sa profilar sco center da congress cun ina purschida d'emprima classa.



**Las expensas totalas da la Sessiun d'atun a Flem èn stadas 1 790 708 francs. La part dals custs dal chantun importa 357 025 francs empè dals 473 700 francs budgettads.**

KEYSTONE

La regenza ha medemamain prendì enconuschientscha dal quint final pertutgant il diever da la part dal chantun a la realisaziun da la sessiun. Il preventiv da l'organisaziun dal project ch'è vegnì adattà il settember ha pudì vegnir

resguardà. Las expensas totalas da tut las partenarias e da tut ils partenaris da l'organisaziun grischuna dal project importan 1 790 708 francs (preventiv 1 850 000 francs). La part dals custs dal chantun importa 357 025 francs

empè dals 473 700 francs budgettads. Quests respargns tar la part dals custs dal chantun ston cuntant vegnir attribuids al fatg ch'ils custs da segirezza èn stads blier pli pitschens che budgettads.